

# Sud

## Pas Sud ai sürü papımarandi

<sup>1</sup>Karihasıhandüri, ro Sud Sisas Kraisindi ratüpuriya-rihandeimbi, Semsindi akid-anahi. Ape God ai siheimbo mborai yahundürühi ngusüfo pamareandür-anei asu Sisas Krais ai hifandımarandüra se nginindi animboei siheimbo pas nda sürü paparihandi. <sup>2</sup>İgga Ape God ai siheimbo hipoambofe hohoanimo, ngusüfo afurife kife hohoanimo asu ngusüfo pefe hohoanimo afındi mbisagadür-amboane.

### Tikai hoafi yamundu-rundeimbi nindou

<sup>3</sup>Wandafi mami, horombo God ai sapo sihefımbı muŋguambo aboedambo-mareamuni ranahambo siheimbo pasambe hoafındahandüri saheheamboyahısi. İgga awi hapondani ana siheimbo pas nda sürü papirihandühi sıhiri anihondümbofe hohoanimo masahumındefi ra tikaruhou yamundu-rundeimbi ai tüküme funda wambo ngusüfoambe botımareandıra se ranahambo gifembohünda nginindi-hamındihandüri samboanahi. God ai mamımbı yangıriyu ahandi nendi ranaheimbo anihondümbofe hohoanimo masagadüri. <sup>4</sup>İgga nindou Godımbı hohoanimo-koateyomo-rundeimbi ai sıhefi mbusümo dıbo hasıyafu tüküyafu sıfomomboanemo. Rananemo asu ai Godındi-mayo moani hipoambofe hohoanimo ra hıhıru ngorı sünguru hoafıyomo arundi ahamundi moaruwai hamındi hohoanimo ra gabudıfe-mbohünda. Rananemo ai sıhefi Bogori Adükari Sisas Krais ranahambo yıboarukoruwurühü daboadı hıhırimarıwurü. Horombo hondü Baıbor yahoya, 'Nindou ranai süngunambo asübusı ndowandümboemo,' meho.

<sup>5</sup>Awi se ndani hoafi ndanahambo ndorıhi fıfırıhi-mboaneısi, nıga awi ro siheimbo namühi hoafındahandüri samboanahi. Adükari ai İsrailerımbı aboedambo-mareandüri İsip hıfıambeahındi, nıga ai süngunambo nindou ahandi hohoanimo anihondümbofe-koate-mayeia asu ai aheimbo moaruwaimbo-mareandüri. <sup>6</sup>Horombo sünambeahındi nendi ai God ratüpuri ahamumbo masagapuri ra moei yahomo hou hıfandıkoate

hiniŋgimarundi. Ŋga ai moani ŋgoafi hiniŋgi-marundamboyu, asu God ai ahamumbo sen ŋginindinambo hüputüpu-rapurümündi mbura nimbi nimarowambe ragu papi-hoafiyupurimbo-hünda hiniŋgi-mareapuri. Asu God ai ahamumbo tiŋirifo saimbohünda ai Godindi yibobofembo si ranahambo hifandundühi amarimo. <sup>7</sup>Yahurai-ane horombo nindou Sodom asu Gomorahündi asu ŋgoafi akimi rani fikimi adaburo ranihündambo nindou amboani sünambeahindi nendi ramefundi nou yarihi hohoanimomaye-ane. Raniyu asu God ai aheimbo hai koadürümbo hori-randeimbi ranambe hiniŋgi-mareandüra asübusi afindi masahümündi. Ŋga aheimbo yandihu hondihundüri mbundihumbo animbo asu sihiri amboani yahurai refepoani, ŋga ranahambo ndondihu türüboadi-humboane.

<sup>8</sup>Mami rani-süŋgumboane nindou ranai-amboani nine-moatükuni yafogoadinambo nahurai tüküfeyoani ranahambo süngurihindühi moaruwai hamindi nindou tükümehindi. Rananei ai Godindi ŋginindi ranahambo daboadi hihirihindühi himboamupuimbo-randeimbi sünambeahindi nendi ranahamumbo tirifoefe hoafiyahüpuri arihündi. <sup>9</sup>Horombo sünambeahindi nendi-yomondi bogori, ahandi ndüri Maiker, ai moai ramarihindi nou rareandi. Ŋga ai Satan-diŋbo Mosesindi fi ra didi manderümündi safani hena simbori hoafiyafandühü ai moai Satanimbo tirifoariri papi-hoafirüri. Ŋga ai yare hoafiyuhü yahuya, 'Adükari ai-animbo sihambo moaruwai watikoafi-mbiyunin-amboane!' mehundo. <sup>10</sup>Ŋga nindou ranana nimindi ra fifirifekoate wamboanei ranahambo ai tirifoarihi hoafiyei arihündi. Asu ai ninihondi nahurai hohoanimo fifirife-koate-anei nini-moatükuniyo hohoanimoambe tükefeyo ra süngurihi arihündi. Ranane asu ahei rani hohoanimo ranai aheimbo moaruwaimbo-reandüri arandi. <sup>11</sup>Hipoanimboebou-anei, ŋga aiana asübusi afindi ndahümündimboyei! Aiana sapo horombo Ken hohoanimomayu hohoanimo-ane süngurihi arihündi. Aiana horombo Baram tikare-haya ramefiyu nou ai kaki semindimbo-hündambo yanggiri ratüpuriyei arihündi. Kora ramefiyu nou ai Godimbo süngufekoate-maye-amoani asu ai aheimbo moaruwaimbo-reandürimboani.<sup>a</sup> <sup>12</sup>Se mami fandühi nimarimbo nindou ŋgorümbo aboedi hohoanimo-yondorambo sesesi-yeihi nimarian-anemo asu nindou ranai se-babidi nimarimondühi ahamundihoari sowasümondühi nindou bidifirambo saikoate-memo. Ahamundi hohoanimo ra sihei fandühi arihündi ra moaruwaimboru arundi asu ai didibudümbi moatükuni nahurai-anemo.

<sup>a</sup> 1:11 Ken ai ahandi akidambo ŋginindiyuhü hifikoamariri (Stat 4). Baram ai kaki semindimbohünda Israerimbo moaruwaimbofe hoafi hoafimayu, ŋga God ai moai ahandi hoafi himboriyu. (Namba 22-24, fo 23:4-5). Kora ai Mosesimbo daboadi hihirimariri ranimboane asu God ai ahambo hifikoamariri. (Namba 16).

Rananemo asu ahamundi fimbo yangir-anemo aiana hohoanimoyomo hoangomo arundi. Aiana sapo mburungai werinambo kikamindi pireandani hoe-koate moani goagu aho yahurai hamindi nend-anemo. Aiana sapo nimi hisi simboani hisi-koate aningo nahurai-anemo. Asu ngoambo nimi sapo nindou ai ahasihari kibodirihinda emündü pefoi haya yapari aningo nahurai-anemo. <sup>13</sup>Ahamundi amoaningümbi ratüpuri ra sapo hohoambu afindi howohü wutipuari semindi ho momoehoani koararihendi yahurai-anemo. Horombo God ai sapo mupui hoahoango-randeimbimbo nimbi nimarowambe ranihü koadürümbo nimanidifi ndandi yahuhaya hiningimareandi yahurai-anemo.

### **Nindou ranai tijirifo moaruwai ndowandumboemo**

<sup>14</sup>Enok ai Adam nungu-ambeahindi 7 amoambofi tüküfi manungu. Ai nindou ranahamumbo horombo hondü hoafiyuhü yahuya, “Hoeirih! Adükari ai ahandi sünambeahindi nendi afindi tausen engoro rani-babidimbo kudumbui munguambo yibobofe-mbohündambo. <sup>15</sup>God ai nindou munguambo ‘se hütüyei,’ mbüsü haya ahambo fifirifekoate-aye ranaheimbo tijirifo dagadürimbui. Sapo ai Godimbo hohoanimokoate moaruwai hamindi moatükuni ratüpuri süngurihündühi asu ai Godimbo moaruwai hamindi hoafi hoafiyei marihündi ranimboane ranaheimbo tijirifo dagadürimbui,” mehu. <sup>16</sup>Nindou ranai ana ninimbo ra ai yiboaruko hoafiyomo wakirundühi nindou ngoründi-wami papife hoafi afindeimb-anemo. Aiana ahamundi moaruwai hohoanimo megoro rani-yangir-ane sünguru homo arundi. Aiana ahamundi fimbo boriyomo arundi asu nindou bidifiramboya, ai yihoefi hohoanimo rani-süngumbiri-hinda yahomomboanemo aheimbo hoafi nafirundüri arundi.

### **Se hibadihumbo sihei anihondümbofe hohoanimo ra kikihindühümüdi**

<sup>17</sup>Se wandi ngusüfohünd-anei, se sapo nine hoafi siheimbo sihefi Adükari Sisas Kraisindi hoafi sowandümo homo-rundeimbi ai horombo hoafimemondüri ranahambo hohoanimondei. <sup>18</sup>Ai siheimbo yaru hoafiyomondühüya, “Bidifiranambo si tüküfeyo-ambe ana, tirifoaru hoafiyomo-rundeimbi tükündafumboemo asu ai ahamundi Godimbo fifirife-koate hohoani süngundu ndumboemo,” mehomondüri. <sup>19</sup>Nindou ranai hifinindi hohoanimo sünguru asu yikürübüru-rundeimb-anemo. Yifiafi Aboedi ranai moai ahamundi ngusüfoambe nimaropuri, nga wani. <sup>20</sup>Ngga wandafi mami, sihei anihondümbofe hohoanimo ra Godindi yangir-ane asu se nginindi anihondümbo-fembohünda simbori farihefirindei. Sapo Yifiafi Aboeindi-mayo nginindi raninambo-animbo Godimbo didibafindei ndühündi. <sup>21</sup>Godindi ngusüfo pefe hohoanimo ranambe nimboei ngei. Se sihefi Adükari Sisas Krai ranai ahandi

hipoambo hohoanimo ranambo yanggiri koadürümbo-koadürümbo niŋgombo ra ndemunimbui mbisei hehi himbondeihi nimboei. <sup>22</sup>Nindou didiyei ai ndofe anihondümbofe-koate moani mbusümondühi nimboei wakarihindi ranaheimbo hipoambo-ndihindüri. <sup>23</sup>Bidifiri nindou aiana hai ŋgoafina ho nafini aniboadei, ŋga se nimai aheimbo ranambeahindi kündahi hündühümüdi-hündüri aboedühi pindihindüri. Nindou bidifiri ahei ŋgusüfoambe botifembo moaruwai hohoanimo aheimbo hifandirandüri arandi. Ŋga se aheimbo moani yihimbondeihi hipoambo-ndihindüri. Hibadühündi, ŋga ahei moaruwai hohoanimo raninambo se moaruwai tükündahimboyei.

### **Godimbo hihifi hoafi**

<sup>24</sup>Sihiri God mami yanggiri ahambo aboed-ani mbisefimboane. Ai-animbo siheimbo kikihindamündü nūnguani asu se ŋgiri anihondümbofe hohoanimo hiniŋgindihindi. Ai-animbo siheimbo ndemündündüri gafu didiboadonde ahandi himboamupuimbo-randeimb-ani himboahü ranambe hüti-koate hihifi-hihifi kapeihü hiniŋgi-ndearümbui. <sup>25</sup>God ai sihefimbo aboedambo-reamuni-randeimb-ani. Sihefi Sisas Kraisindi süŋguyu Godimbo hoafiyeih-ani seiya, “God ai adükari ndüreimb-ani, adükari bogor-ani, ŋginindi adükareimb-ani asu muŋguambo moatükuni hifandandeimb-ani,” mbiseiamboane. Muŋguambo si horombo maho ai yahurai manūngu-ane asu hapondanambe asu süŋgunambo amboani ai moani yahurai koadürümbo-koadürümbo nūngumbui. Anihond-ane.